

Vischnaunca politica Andiastr

Radunonza communal dils 11 da zercladur 2010

1. Beinvegni ed elecziun dil dumbrauschs

President communal Sievi Sgier fa in cordial beinvegni. Sco dumbrauschs vegnan Priska Capaul e Rolf Sgier proponi ed elegi. Encunter la gliesta da tractandas dat ei neginas objecziuns.

2. Prelecziun ed approvaziun dil protocol dils 16 d'avrel 2010

Il protocol dalla davosa radunonza communal dils 16 d'avrel 2010 vegn prelegius ed approbaus unanimamein.

3. Quen communal 2009

Il quen current 2009 siara suenter expensas da frs. 1'197'129.96 ed entradas da frs. 1'208'529.05 cun in surpli d'entradas da frs. 11'399.09. Amortisaziuns ordinarias e supplementaras sin la facultad administrativa e finanziaria ein vegnidas pridas avon ell'altezia da total frs. 294'846.65.

Il quen d'investiziun 2009 siara suenter expensas da frs. 1'189'085.35 ed entradas da frs. 952'030.45 cun in surpli d'expensas d'investiziun da frs. 237'054.90. Las pli impurtontas investiziuns egl onn 2009:

- sanaziun dallas vias da funs
- sanaziun e remodernisaziun dalla casa da scola
- investiziuns en connex cul project "GEP"
- sbuau sill'Alp Miez/Alp Sura
- sanaziun dalla via d'uual Pattadiras - Resgia Veglia

La cumissiun da gestiun propona alla radunonza communal tenor rapport dils 31 da matg 2009 dad approbar il quen 2009 e la bilanza per ils 31-12-2009 sco era da dar scarica als officials da vischnaunca ed all'administraziun.

Dil quen communal 2009 ei medemamein vegniu priu investa entras igl uffeci da vischnauncas a caschun dalla revisiun dils 18 e 19 da matg 2010.

Unanimamein vegn il quen communal 2009 approbaus. Medemamein vegn dau unanimamein scarica als officials da vischnaunca ed all'administraziun.

4. Damonda da baghegiar pli damaneivel

Cun scriver dils 30 d'avrel 2010 han Anita e Robert Tuor-Alig orientau la suprastanza communal davart lur project da baghegiar a Vitg. Numnadamein han els previu da construir in tetg per in plaz da seser avon lur casa sin parcella nr. 353. Per saver construir il baghetg tenor ils plans inoltra basegna ei d'in dretg da baghegiar pli damaneivel, cunquei che la distanza tier la via communal ei memia pintga.

La suprastanza communal ha en sia sesida dils 10 da matg 2010 priu enconuschientscha dalla damonda e concludiu da presentar tala a caschun dalla proxima radunonza communal.

La suprastanza communal fa la proposta da dar suatientscha alla damonda. **La radunonza fa buca diever dalla discussiun e concluda unanimamein da conceder il dretg da baghegiar pli damaneivel.**

5. Damonda da credit per il project general dil provediment d'aua

Il provediment d'aua dalla vischnaunca d'Andiast ei vegnius construius avon 60 onns. Differents implonts per tschaffar e reparter l'aua ein vegni construi els davos 30 onns. Tals implonts duein vegni sanai ni renovai.

In instrument adattau per elaborar in'analisa cumpletta senumna "Project general pil provediment d'aua" (Generelles Wasserversorgungsprojekt GWP). La planisaziun e las finamiras d'in tal project vegnan elaboradas sin fundament da directives dall'Uniun svizra per gas ed aua. En in'emprema fasa dil project ei da registrar tut las datas avon maun. En ina secunda fasa vegn elaborau in concept general en detagl per garantir in provediment cun aua schubra da beiber ed aua da stizzar, en quantitads sufficientas e che corrispunda allas pretensiuns higienicas.

Ils cuosts per l'elaboraziun d'in tal project san vegni calculai cun rodund frs. 20'000.00.

La suprastanza communal fa la proposta da conceder il credit necessari. **Il credit necessari ell'altezia da frs. 20'000.00 vegn concedius unanimamein.**

6. Midada parciala dil reglament da pumpiers Vuorz/Andiast

A caschun dalla sesida dalla corporaziun da pumpiers Vuorz/Andiast han ils representants dallas vischnauncas secussegliau davart il reglament da pumpiers vertent. Art. 12 dil reglament regla la deliberaziun dil survetsch activ. Dallas persunas ch'exequeschan funcziuns officialas ei sulettamein il president communal deliberaus. Daniev duein era ils ulteriurs commembers dalla suprastanza communal ed il canzlist communal vegnir deliberai dil survetsch activ.

La suprastanza communal ei oz fetg occupada cun uatgas, sesidas, radunonzas eav. La deliberaziun dil survetsch activ da pumpiers fuss in grond levgiament.

La suprastanza communal fa la proposta dad approbar la midada parciala dil reglament da pumpiers Vuorz/Andiast. **Suenter cuorta discussiun vegn la midada parciala dil reglament approbada cun 12 vuschs encunter 1 vusch.**

7. Midada parciala dil regulativ da taxas

Il regulativ da taxas vertent datescha digl onn 1990. En connex cun la revisiun dil quen communal ei vegniu constatau che las taxas da diever per il consum d'aua ein memia bassas. Las entradas annualas tonschan buca per curclar las expensas el quen. Denton era las taxas per lubientschas da baghegiar ein buca pli conformas al temps dad oz e basegnan medemamein da certas adattaziuns.

Ord sura numnadas ponderaziuns suttametta la suprastonza communal ina midada parciala dil regulativ da taxas.

Las taxas annualas pil consum d'aua vegnan augmentadas sco suonda:

vegl:

- taxa sil diever
frs. 0.25 / m³
- taxa sil baghetg
0.1 ‰
- taxa sin spina
frs. 16.00 / spina
- taxa sin habitaziun
frs. 10.00 / habitaziun

niev:

- taxa sil diever
frs. 0.35 / m³
- taxa sil baghetg
0.2 ‰
- taxa sin spina
frs. 25.00 / spina
- taxa sin habitaziun
negina taxa

Las taxas da colligiaziun digl acquaduct vegnan adattadas sco suonda:

vegl:

2. classa:
Baghetgs cun diever masaun d'aua, casas e casas da vacanzas cun ina ni pliras habitaziuns
1% (taxa minimala: frs. 1'000.00)

3. classa:
Baghetgs cun grond diever d'aua, hotels, pensiuns casas da colonias etc.
2% (taxa minimala: frs. 5'000.00)

niev:

2. classa:
Baghetgs cun diever masaun d'aua, casas e casas da vacanzas cun ina ni pliras habitaziuns
1.5% (taxa minimala: frs. 1'000.00)

3. classa:
Baghetgs cun grond diever d'aua, hotels, pensiuns casas da colonias etc.
2.5% (taxa minimala: frs. 5'000.00)

Las taxas per lubientschas da baghegiar vegnan adattadas sco suonda:

Cuosts da baghegiar:

Taxa minimala
frs. 1'000.00 - frs. 10'000.00
frs. 10'001.00 - frs. 50'000.00
frs. 50'001.00 - frs. 100'000.00
frs. 100'001.00 - frs. 200'000.00
sur frs. 200'000.00

Taxa:

frs. 60.00
frs. 100.00
frs. 200.00
frs. 300.00
frs. 400.00
2 ‰

La radunonza communal fa diever dalla discussiun e concluda unanimamein dad approbar la midada parciala dil regulativ da taxas.

8. Varia

Dil tractandum varia vegn buca fatg diever.

Andiast, ils 11 da zercladur 2010

Il president:

Igl actuar:

Sievi Sgier

Giovanni Damiano